

四庫全書

集部

欽定四庫全書

集部

兩宋名賢小集卷二百

四十七至
五十一

詳校官中書

臣孫溶

助教

臣常循覆勘

總校官編修

臣王燕緒

校對官學正

臣周鉉

謄錄監生

臣趙金簡

欽定四庫全書

兩宋名賢小集卷二百四十七

宋 陳思 編

元 陳世隆 補

翠微南征錄六

華岳

嘲熱

赤帝乘龍駕火車晴空燒斷暮天霞流金爍石休相酷

少皞看看催戍爪

三友亭

老松疎竹間梅英三友如何獨擅名應是枇杷并檜柏
當時無力預同盟

青樓贈別

笛聲吹徹玉樓寒金鴨香銷更漏殘含淚欲揮羞不敢
倩他銀燭向人彈

枕上吟

畫角梅花吸曉寒
數聲清徹碧雲端
誰知有客愁無寐
一掛鄉心不奈酸

重九

破帽無情不受吹
滿頭霜雪已如絲
菊花笑我三年客
風物撩人九日詩
三楚膏腴已煨燼
二江皮肉更瘡痍
子卿三月無音信
鴻雁南來何所之

禱梅山

許我登龍尚未還
作詩更為謁梅山
如何威惠推千載

猶使英雄困八蠻神不提身歸虎帳鬼須擘口動龍顏
聰明儻為扶宗社願借風雷頃刻間

寄西山

姓名久不到西山覓便無風鼻漫酸天慙有花春信急
地爐無火夜堂寒青燈昔記對牀卧白髮今羞把鏡看
見說北歸常有雁一書無惜報平安

再禱梅山

梅山昔叩五通仙曾許英雄第一籤恰遇塵埃常擾擾

如何泥濘尚淹淹若非推入高宗夢須是驅成太史占
他日高高詠申甫一香先為大王拈

怒題

壯氣橫秋面渥丹男兒未遇指休彈賣漿豈料周分國
盜粟焉知漢築壇脰脰未甘纏俗鞅羈牒不信誤儒冠
夜深踢起牀頭婢和淚挑燈把劍看

寄范茂卿

社風吹迸雨前枝正是施工北苑時小勝未封纔入盡

短鎗初拆半含旗一盃臙雪分龍井萬杵春雷入鳳池
見說貢餘山畔積小煎還肯換新詩

題溪莊

山擁青螺出粉牆水環銀帶挿溪莊一百五日雨翻浴
三十六宮人鬪雉蜨翅拍花催舞袖鳳毛翻錦入詩囊
新歡舊恨知多少且對東風醉幾場

奇見

紅牙催拍燕飛忙一片行雲遶畫堂眉黛蹙成遊子恨

臉紅燒斷故人腸
榆錢不買千金笑
柳帶何須百寶粧
舞罷隔簾偷送目
不知誰是楚襄王

思故人

太乙年來落冀并
幾多豪傑未成名
堯天日月計和玉
胡地山川知耀卿
盧六驅風能破屋
陳三平水可傾城
年來幕府勤延攬
何事諸兄未有聲

呈古洲老人

衛霍勲名李杜才
纔過四十也心灰
俗塵趁少便披拂

詩料空多難剪裁
時事漫提眉
便皺家懷未說
眼先開
朱簾更倩梅香挂
要得銀蟾入座來

訓小童

飯罷令人喚小童
敢煩提耳為開蒙
芡茶不用焦湯點
紙被還將豔火烘
醉欲伴眠當倩月
熱求揮汗合邀風
他時我建清油幕
庶汝封侯學衛公

郊飲

茅舍松棚隔小橋
碧帘斜挂竹籬腰
豬頭煮去和皮擘

牛肉秤來帶骨燒，村酒不圖邀客醉。
墊花復喜向人嬌，歸舟不用撐明月。
只倩西風借晚潮。

西爽

客子東南不著家，主人北里恣豪華。
夜深常倩月移竹，春老不煩風埽花。
暮雨送涼歸枕簟，夕陽留客賦煙霞。
何時執手闌杆外，同把功名誓鎔鉞。

斗齋

八方無處著瞿曇，百合中間寄一龕。
滿挹酒漿供里北。

平量風月借和南腰如可折豈徒五涎若果流何待三
更喜小窗能就拱夜寒江靜看山函

呈楚南僧

剛腸未肯報平安擬把功名一儋儋方向杏壇逃敗北
却於蓮社得和南香同世事炎還涼茶類人情苦始甘
大抵久長同佛法此心何處不瞿曇

山居

布作寬袍竹作冠蕭然萬慮不相關數聲橫笛煙霄外

一箇閒人天地間若遇急流須勇退從教倦鳥不知遷
百年富貴君休羨得似浮生半日閒

吳伯叙

太平官府不停囚求劍烏衣欲刻舟私筴是鷄難做鶴
公庭得馬便成牛不疑若受千金謗膠鬲當貽萬世羞
見說明公在蓮幕不知能鑑此冤不

讀史

史筆如衡須正持莫教浮誕出無稽已成帝業從烹父

未得王師休殺妻秦逸號眠為抱虎劉狂名舞作聞鷄
麟經削後無全筆磨玷吾當問白圭

建安暮秋

斜陽望斷水平橋古柳蕭疎已半凋魚躍浪花翻水面
雁拖烟練束林腰花時無錡能追驥月夜有詩堪續貂
回首故鄉多少恨亂山無數路迢迢

三衢道中

西風吹夢落青帘濁酒三杯路二千別岸舟行秋色裏

故人家在夕陽邊囊中有藥難醫國竿上無鈎可釣賢
見說近來書籍貴監唐川漢莫論錢

秋望有懷

片雲和雨卷西風綽盡遮闌眼力雄遠水半連晴漢碧
暮霞全借夕陽紅姓名未得聯諸子鬢髮皤然已一翁
欲識翠微詩外意豈徒憂國願年豐

送李子方

亂雲推月上層樓樓上珠簾不下鈎雞翅拍開珠戶鎖

雁聲喚上木蘭舟
黃花撚酒留人醉
紅葉題詩倩水流
李廣不侯人不笑笑他人作爛羊頭

寄兩庠同舍

昔年撻鼓叩天閤
遠謫南州七度春
大享有恩來北闕
小囚無路脫東閩
烏衣座滿民流血
畫燭簾深案積塵
見說九重宵旰慮
長沙猶有少年人

呈沁漕宰

長亭不作馬蹄迂
一葉孤蓬入帝都
星布關津皆自放

雷封纂節獨相拘可憐罔市千般有誰信虛舟一物無
為祝琴堂早催發片帆連夜過姑蘇

送詹仲通縣尉

秋郊送行色執別臨清流風神掣回柳故故牽衣裘吟
蜚附草際催客登蘭舟問客何所之駕言京闕遊愚聞
京闕間多難三春秋門外炙魚肉關內羅羊頭鼎却吠
堯犬冠還楚沐猴和戎重輸費廊廟有隱憂賑荒少儲
蓄郡國無良謀飛蝗蔽日月兆龜坼田疇君以經濟材

抱負衝斗牛家傳醫國秘殊不諸子伴有用即隆平豈
特為東周願君攄緒餘咳唾聞冕旒管領一世雄克復
歸神州賤子忝知遇脫網將從遊相隨上凌烟也勝登
瀛洲作詩告於君君其許之不

寄大庾郭縣尉

前年建安權始識韓荆州一見辱知遇許我常從游尋
幽訪赤壁買笑陪青樓有酒即命駕夜飲忘觥籌雪香
飄梅花歸駕仍遲留送君城北隅歲事希一周告德雖

未久有懷奚所投客來自錦溪知為藍田遊樞衣欲趨
隅其奈風馬牛方圖拜尺紙文此不敏羞乃復三不緘
獲戾于君侯謫客干典刑宜爾餐吳鉤幸不畀我死殘
喘延俘囚搜索徧中外釋縛良無由始思鵬鵬翼庇我
反手猶噓燈拂毫楮尺素馳星流荷公三復還惻然添
我憂許我京闕間與我為良謀於今秋復冬俟命猶置
郵西風掠天宇魚雁俱沉浮未審恩波中許我共濟不
我材襪線短願公廣甄收他日賓幕府鏖戰當焚舟公

今不我援復駕言焉求

羣鷗

一聲漁笛發中流驚起平沙萬點鷗去盡青天回欲集
梨花無數落汀洲

雪中有戲

一夜風神揭海神盡將純素掩丹青四圍白壁成千嶂
萬里紅塵沒一星搭岸柳條橫玉帶壓牆梅萼上銀屏
好將今日平淮策說與當年李愬聽

憂世寄清溪友人

廟堂無計息干戈國士銜冤弔汨羅
尺五指天均日月八千里地舊山河
人無遠慮心徒切里有新喪巷不歌
況是十年芹泮客倚闌尤覺淚滂沱

嘲曹掾友人

世態年來日日新宦途澆薄更驚人
闕期動徹連三政選調無疑費百緡
是吏有囊盛短卷非財無藥療長貧
參軍也勝陶彭澤且糴官糧醉幾巡

囚中記貧

英雄不遇不憂貧獄吏從教喚不磨煮飯只燒沽酒罐
讀書權借守囚燈堪嗟世事危如卵無怪人情冷似冰
勿謂功名成倖致志公終不是閒僧

兩宋名賢小集卷二百四十七

欽定四庫全書

兩宋名賢小集卷二百四十八

宋 陳思 編

元 陳世隆 補

翠微南征錄七

華岳

上詹仲通縣尉二首

松竹不著花
密葉徒如帚
紅梅不著葉
寒花綴枯朽
獨

有龍焙茶花葉秀而耦冰霜著羣木凍死十八九惟此
百草靈名可綴三友春雷迸雀舌夜雨滴龍口皆萌哺
啜心誰假栽培手惟有秦端明識之在蒿藪移根入北
苑金碧煥星斗夸作龍鳳團封成獻元后問花何以報
牙舌甘鼎曰他時子復生為公滌煩垢

西風捲荷衣被破不成幅清霜折蕙囊冽冽已成霜如
何獨東籬黃華笑寒菊物之有盛衰循環若推轂世事
良亦然亦豈物所欲金鈿鎔落日零露洒寒玉人皆惜

芳菲誰復念幽獨惟有陶淵明殷勤費培沃簪花從帽
落撚酒醉商陸從此擅秋芳美桂非同錄問花何以報
剪首薦醺醖他時更粉軀為公明眯目

月巖

六丁一鑿空雲烟滿窟勒馬驅神僊冰輪推出月中月
玉斧劈開天外天便把嫦娥騎綵鳳却呼羽客烹銀蟾
更邀王母瑤池酒今夜廣寒同醉眠

九日

木落西風黃葉飛子卿無信雁來遲淒涼自笑劉思父
忼慨難追杜牧之歸興十分濃似酒愁腸一縷亂如絲
憑君細把茱萸問此會明年健有誰

戲呈趙可父

少年場屋擅詞鋒審識無私只奉公夜月蘭宮無宿曜
秋霜蓮幕有春風明堂難毀周公制鄉校猶存子產功
文德自來能服遠更煩劉向為和戎

挽吳夫人

夫人少師孫女居蜀適王氏
卒年十六葬于舒仙姑之山

駢驚不是厭塵凡
王母瑤池促駕還
家在兩三千里外
人生一十六年間
好隨神女遊舒水
難伴文君歸蜀山
試向仙源問消息
桃花零落水潺潺

岩桂落英

淨埽庭堦襯落英
西風吹恨入蓬瀛
人從紫麝囊中過
馬踏黃金屑上行
眠醉不須鋪錦褥
研香還解作珠纓
宮娥未許填溝壑
收拾流酥浸玉罍

牢城述懷

江外音書久不來重城昏鼓又相催眼前螢制書磨前電
耳底蚊轟屋底雷乃事類棋方入局此心如火已成灰
憑君試問吳元白老冠東川回未回

重午

虎眼龍鬚午未乾楚臣遺淚尚潸潸梅天有雨金丸重
麥地無風翠浪閒蒲解臬風豈臬賊符能驅祟不驅姦
一樽菖酒呼天問何事男兒鬢漸斑

書堂遇雨

風疊雲成片溝槎水作層濕書移案避添硯就簷承瓦
擊聲疑電牕低暗欲燈須臾西漏日晴意慢關勝

南浦客邸

南浦半月雨溪流暗沒沙斷橋虹散綺拍岸雪飛花孤
館客無夢短篷人未家何如擁紅日照我上筠車

借景樓

朱箔鈎新月平闌架落霞百錢呼酒炙四壁聽笙笳翠
映誰家竹香飄何處花功名未歸我且此寄生涯

春夫

秭糠粒粒裹真珠玉杵春來白有餘待問嫦娥借金鼎
等閒令汝作蟾蜍

花村

問宿花村喜有餘已拚花下倩人扶牧童不見枝頭杏
空向青帘問有無

夜宿花村不見花數間茅屋瞰溪沙山翁不是通名姓
幾誤河陽令尹家

午枕

三盃未醒復三盃醉眼朦朧劈不開急辦藤牀并竹枕
要隨蝴蝶到蓬萊

香篆

擊覆雕盤一擊開星星微火自徘徊還同物理人間事
歷盡崎嶇心始灰

有觸述懷

英雄還要識英雄不識英雄總是空投鼠在人當忌器

見鴻非我獨彎弓情從忠佞分輕重事戒恩威戾始終
說與翠微休截截三緘從此更須工

岩桂

西風吹老碧蓮房萬壑風流折麝囊漫與籬花爭曉色
肯教盆蕙壓秋芳月中有女曾分種世上無花敢鬪香
要識仙根迥然別一枝開傍鄰家牆

偶成

一別京華近十年此心無日不悠然嗅梅得句天然巧

把酒開懷地自偏
鐵硯不須兵十萬
銅盤何用客三千
功名自有風雲會
不遇風雲每自煎

寄王士貴

畫橋相送百花春
轉眼孤鴻遂斷雲
別後有誰能顧我
客中無日不思君
風前花影常興念
月下桐聲久不聞
見說近來多好況
一書無惜寄云云

發書與幼弟及坦齋

風烟世事不堪聽
勿謂封侯勝白丁
老眼隔年新舊歷

歸心連夜短長亭一聲蜀鳥驚蝴蝶十幅蠻花寄鶴鴒
更向坦齋夫子道近來雙鬢已星星

寄王清之

封書漢上寄清之却恐清之漢上歸千里漫懷明月共
寸心常伴白雲飛湘妃有淚能斑竹周士無心戀采薇
安得一絨飛海嶠與兄聯轡上淮淝

感應王祠

如神正直護縲囚當代公卿總合羞疏紙未燒謀已遂

爐香方爇病先瘳乞靈屢假三更寐釋縛當封萬戶侯
待得有勲書竹帛一封當為薦宸旒

寄張舍人

萬冤無計就亨衢三尺金科漫卷舒公不戴星馳駟馬
民將指日就枯魚黃堂宴妓不加意丹陛慮囚空有書
見說羣烏廣瞻聽如何公論尚躊躇

新市雜咏十首

雲鬟烟鬢縷雙鴉一搦宮腰柳帶花試問行雲何處覓

畫橋東畔是奴家

翠翹佯醉倩人扶約我文君賣酒壚解珮向人陪笑問
一盃容妾佐樽無

恰把青荷插髻鴟嗔人偷眼過窗紗一盤珠翠俱拋擲
却向枝頭摘杏花

遲遲蓮漏不相催亭館無人午夜開風欲捲簾花影動
夢魂疑是故人來

小橋相見便相親猶帶西湖陌上塵欲買一樽聊款曲

歸遲還怕小蠻嗔

不帶冠兒不插花過門佯把扇兒遮
嗔人貪數天邊雁
失記回頭喚喫茶

青衫搵淚向人啼
妾本秦樓浪子妻
流落南州歸不得
青樓今在畫橋西

一年不訪李紅娘
今日過門意已忘
嘶入畫橋東畔路
紫騮猶記舊垂楊

花牋得得寄瀛洲
約我今宵特地留
好笑蒼頭迷去路

綠楊無處認青樓

朱門粉壁謫仙家
柳外鞦韆襯落霞
一澗碧雲流不去

木蘭舟繫木蘭花

嘲賀將仕二首

花何太喜誰能賦
葉是良媒解寄詩
但覺人間傳盛事

不知天上集佳期

吾身西園拘猶少
君腹東牀坦已多
我欲屠牛窮建節

君從歡譙小登科

冬晴

鵬月南州不類冬
梨花飄粉小桃紅
未曾飛動遙山雪
早有春三二月風

夢謫仙

夢駕白雲參謫仙
謫仙留賦白雲篇
醉將隻手拏虹筆
便扯青霄作綵箋

呈毛南仲

暮宿東溪一草堂
倦和衣履卧胡牀
夢隨鷺去遼天濶

夜到鷄鳴剗地長早起不煩禽屢喚多憂誰謂草能忘
清閒却媿毛南仲醉卧西窗一枕涼

除夜二首

纔辱東皇造化工便隨飛鵲報簾櫳人間狴犴知無所
天上蓬萊還有宮酒色半澄春後綠蠟花全折夜來紅
從今泰道能連茹願駕蒼蟠躍震風

吳鉤不是怒鯨鯢夜半劉琨屢舞鷄十載載春游太學
二年年夜宿圜墻焚盤未必資毛遂周粟如何飽叔齊

塵世功名倘來爾無言桃李自成蹊

呈富大卿

司晨未曉報龍樓昨夜中天貫索流石父不逢齊國相
馬遷空作漢家囚銅壺滴碎短長夢鈴索拽翻新舊愁
安得君王賜歸騎一塵投老大江頭

雪中呈劉子沖

朔風捲水入天衢剪作飛花散六虛竹本無聲綠葉密
梅因有影怕花疎路從玉鑑上頭過家在水壺裏面居

欲作一詩撩謝女不知為況近何如

再還建上舊居

門外梅花拔復栽
回時春去去春回
兒童拍手應相笑
歸去賈生今又來

兩宋名賢小集卷二百四十八

欽定四庫全書

兩宋名賢小集卷二百四十九

宋 陳思 編

元 陳世隆 補

翠微南征錄八

華岳

熱中呈楚南僧

炎帝執鞭驅赤龍
火車萬乘燒長空
長空萬里俱蘊隆

流金燦石天地同我來亭亭日當午欲避驕陽竟無所
願求一洒楊柳枝化作東閩萬家雨

送春

留春無計奈春何九十過眼如飛梭三分二分風雨爾
十日九日愁悶呵風前飛絮正無數雨後落花全不多
爭如買酒速相就君自起舞吾能歌

僧畫

萬景峯前老禪叔搜羅風月歸岩谷胸中有句吐無聲

寫作生綃三四幅

賀趙法曹

紅日轉簷花飛鳴一聲鵲鵲翅未離簷有客拽鈴索呼
童急啟戶問客意何若客聞笑而言法曹參計鑰因知
鵲之鳴報我良不惡知我門下人一鍵聊相託如公材
器大末掾豈能縛咫尺蓬萊宮左右芙蓉幕直入鳳凰
池更上麒麟閣賤子無所需願作揚州鶴

矮齋雜咏二十首

東風吹恨上眉頭兩岸桃花瞰碧流一片紅雲飛不起
斷霞殘照落汀洲

夢回斜月挂林端酒力初消怯夜寒何處客舟猶未泊
一聲柔櫓過前灘

無肉鷓鴣入水頻雙童聯網立沙濱問渠埽得魚多少
纔可為羹了一人

聯翩屐齒破苔痕醉裏觥籌不計陳來日不須關太史
五星今返聚甌閩

投宿茅亭得夜涼
鷓鴣斑搖落奏宮簫
青簪擊破寒窗紙
漏得山花一線香

曉鐘掣動巨鼇堂
枕上春雷一夜轟
應是金鱗三十六
化龍頭角逞崢嶸

一聲殘角送黃昏
獨倚欄杆空斷魂
竹影埽堦塵不動
自挨明月閉柴門

萬事關心兩鬢秋
柳灰何用苦文羞
無情霜雪催年少
閒似青山猶白頭

梅梢弄粉做新晴積雪殘雲沒一星只把眼前春事卜
麥坡已作佛頭青

十年南國嘆徘徊一片鄉心撥不開應是西湖花柳問
風流何事未歸家

紫騮回首客思歸萬里家山蝶夢迷問宿暮山林下邸
夜深生怕杜鵑啼

長天萬里掃清秋宿霧朝雲去不留向曉殘星猶未落
一盤棋子倩誰收

前回風疹徧身紅布褐因燒艷火烘兩腿熱瘡今又發
休將紙被把頭蒙

一曲漁歌古渡頭幾多鷗鷺起汀洲西風吹散瑤池雪
點破長天萬里秋

朔風號木作嚴霜錦被重重凍欲僵夜半腳跟疑已割
夢魂安到得高堂

獨自清閒獨自忙杳無人迹到蕭牆眠時不用呼童僕
自有清風為拂牀

秋波春水照殘霞恨雨愁雲髣髴飛上領襟隨得去
妾身安得似楊花

東風吹恨入青樓滿目春容總是愁楊柳織成絲萬縷
憑誰裁作翠茸裘

閩南十月已春回無限風光暗裏催桃李海棠俱鬪艷
誰云梅是百花魁

桃溪噴火柳拖烟如豆青梅已半酸燕子怯春歸未得
一簾風雨杏花寒

懷九江友人

浪泊西風萬壑秋，幾多香餌落金鈎。
無魚可釣渾閒事，留得絲綸在即休。

禱富沙

十年蹤跡淖泥沙，為炷靈香禱富沙。
萬里無由詣霜闕，一書聊欲為星槎。
解驂許我來齊晏，釋縛從君問左車。
他日橫飛上麟閣，行祠當為建京華。

謝劉判院

細軸濃雲寄矮齋蒲團和氣忽驚回一牀浪捲芙蓉皺
十幅香重綿繡開不怕夜寒侵斗帳却愁春夢到陽臺
感恩未作瓊瑤報先把新詩寄小梅

寄茗溪故人

昔年分袂雪江東繫馬花梢撲亂紅解珮送行情怏怏
舉盃言別恨忽忽中人以上誰知我北斗以南惟有公
此去東閩有良便一書無惜慰羈窮

不禱

不炷靈香不誦經
詭杯籤榜總欺人
窮通只合從天地
禍福何須問鬼神
命到死時生莫倖
事當直處曲還伸
從今若問開先事
桃李無言二月春

送提舉陳工部

溪風拂拂卷征衣
溪上攀轅恨馬遲
蝗不入閩今已矣
碑無留峴古求之
泉如送客聲猶咽
燭昧留人淚漫垂
願速長沙還賈誼
為公江上斬鯨鯢

即事

欲行未去兩紛拏何事回天力未加九牧誰為十羊主
百冠當念一人髻肘邊有石心雖切腰下無錢手漫叉
千里有人逢伯樂為言龍種尚盤車

呈陳信之

老來百計總無成當路時官懶問名國事只將心事比
今人難作古人評蒼頭笑我樽無佐白髮欺人鑷又生
惟有建谿知客意過灘時作不平鳴

寄江子岡

和夜封書上子岡別來化日又舒長只知電燭兩經月
不覺星毛半欲霜竹葉照人凝盞滑梅花撩客透籬香
知他詩債曾償未料得尋春日日忙

書太乙編年卷尾

年來太乙犯咸池三式編年事可疑西北膏腴從脯腊
東南皮肉恐瘡痍堯天日月期無已北地烟雲歲有之
更向江湖問同志中原何日是歸期

怒成

舌端豪氣吐長虹四海一身無處容不向北山求刺虎
便從南海學屠龍鼎須劉闢方成器劍到魏齊那是鋒
欲把不平朝玉帝夢魂飛上祝融峯

褚衾

霜風剪水作

闕

織出吳綾不用梭十幅曉雲藏處士

一牀秋水浸嫦娥直疑天上無青女却信人間有睡魔
更向屏山畫梅竹紅塵還有此風麼

勉趙法曹

銀潢河海浸崆峒君獨軒昂萬派中北鄙虎牢今子產
東山狼跋古周公固知魯衛封同姓合向燕秦策異功
我欲誓江同擊楫中流無惜伴英雄

獄中責廷尉

重門有路透泉關便合摠衣問比干愧我直言難媚竈
從渠怒髮自衝冠烏臺有月身何及犴獄無天淚漫彈
自恨不逢包孝肅此身那許報平安

吾巾不是不冠儒曾被儒冠幾誤予鐵硯不磨天地軸

毛錐難復帝王居當時衛霍無傳秘却恨韓曹不著書
堪笑蒼生無眼力不知豪傑在樵漁

酒歌

嘗聞子美清江曲日典春衣耽美祿又聞太白遊長安
市上熏熏醉眠熟風流國裏太平時處處紅樓漾酒旗
王孫公子恣行樂繁絃脆管相追隨誰知寥落天涯客
笠頂清風秋挑月芒鞋踏徧山水雄奮身欲入黃金闕
方嗟蕭索向西園刮面寒風雨漲天回頭忽喜黑衣至

急破紅泥傾數船雖無皓齒歌金縷也埽新詩狂欲舞
兒童拍手笑攔街應怪吳儂喜如許長江波浪卷銀山
去去仍悲道路難只憑一醉進未得更借高風吹片帆

琴

月浸虛堂夜氣清起聽萬籟寂無聲輕輕拂動匣面塵
玉笋不彈風自鳴

村居

莫怪村居僻村居亦可嘉僕羸腰帶艾婢倩髻簪花歌

罷蛙催樂酒闌蜂報衙門前少車馬慚愧五侯家

宣城道中

恰則杏花天轉頭過禁烟燕歸纔數日蠶起又三眠少
智慚樗里多材憶孟堅功名且隨分無苦自咨煎

過新豐市懷古

路出橫江去虛堂立道偏雨聲楊柳外風色杏花前有
淚沾詩宿無歌迷酒仙采江千古恨號認向誰傳

買舟浦城

畏路逢危路尋舟得小舟始云為得計終乃復添憂艖
狹難伸足蓬低怎舉頭十圍無處著踣促向中流

憩妙因寺

蕭寺寒山外崎嶇一徑幽斷雲迎客入曲水護堤流木
石四時古軒窗五月秋午煩聊小憩拂石為支頭

再繼前韻

俗塵方倥偬得得訪清幽烟練

闕

抹山屏翠欲流松

筠掃日月藤蔓懸春秋物外有餘樂吾生空白頭

兩宋名賢小集卷二百四十九

欽定四庫全書

兩宋名賢小集卷二百五十

宋陳思編

元陳世隆補

翠微南征錄

九

華岳

丹青閣

未識丹青意憑欄試解嘲烟雲朝起陸汀渚暮生潮山

卓數枝筆天橫一幅綃霞收紅暈淺溪褪綠痕消箇裏
風煙冷於中景物饒飛黃凌翠閣寒碧瞰紅橋酒盡香
凝甕詩成錦掣幬朱衣扶客醉翠袖殢人嬌屏帳接千
里畫圖連九霄長風來水尾斜日轉山腰赤脚支筇穩
蒼頭控馬驕老臣今已矣兒女總金貂

春閨雜詠十首

溪館供庖獨有魚溪翁日日叩吾廬兒童不問無錢買
便拽鈴兒喚小厨

午簾風清帳自開日斜雙鼻尚鳴雷不知蝴蝶何方去
多少黃鸝喚不回

石痕新褪落溪毛應是春流昨夜潮紅雨入簾衣不濕
玉人沾作鬢邊嬌

眉帶遙山淡拂秋幾多春恨鎖重樓真珠半卷嬌無力
須索偎人為上鉤

宿酒初醒午夢回不忺梳掠傍妝臺曲肱斜把香腮托
却訝荷花藕上開

勸罷浮酥酒一卮
殢人相伴塑獅兒
却將凍手和衣拍
笑我金鈴用橘皮

紅猊燒盡夜堂寒
銀燭生花玉漏殘
沉醉歸來渾不記
阿誰扶我上雕鞍

小蘤栽成一把蓮
問渠邀價勒三千
五人不問成和否
移向西窗畫舫前

鳳簫吹斷古梁州
獨倚東風十二樓
醉把珠簾和露捲
恍疑新月是銀鈎

不整烏雲不畫眉天然標格自相宜
梅花羞對旁人插
背倚屏山捻一枝

早春十絕

自歎身如不繫舟幾年漂泊在南州
柳絲只解弄春色
不把紫光絆客愁

故山煙靄接層樓樓上離人淚欲流
誰謂樓高添望眼
一層樓上一層愁

雪滿遙山玉作堆幾多花柳望春回
出門獨有平坡麥

一派生青熨不開

夜來不敵楮衾多全勝吳綾與越羅好是玉人春睡起
白雲堆裏見姮娥

青帘久不訪文姬樽酒殷懃疑翠微沉醉不須籠畫燭
自挑明月送郎歸

十年不謁五通仙自嘆何時接聖顏此去行祠應不遠
白雲深處是梅山

詩道風光在水西水西我意未為奇若教南北東溪去

更費詩人無限詩

尋春不遇欲空歸
竹外橫斜拾一枝
且喜東君有消息
隔香應不怕疎籬

一書欲寫寄雲鬟
更把春衫裹素蠻
欲識相思誰最切
淚痕今作鴈鵝斑

蒼生千里望雲霓
何事英雄去路迷
見說九重新有夢
濟川人在北岩西

夜有所聞

好風吹月上迴廊花壓闌干子漏長天籟不鳴天外竹
披衣潛起聽鴛鴦

挽戚虛中

夢裏匡廬興未闌轉頭世事已辛酸肥家有術疑非藥
漉酒從人笑不冠雁序向人羣已失鳳雛過眼影何單
不堪回首原頭路一塢松楸生暮寒

闕題

大夫策定在吳鉤浪把橋門作勝遊綠筆誤人隨驥尾

錦幟還我占鰲頭關山夢寐三千里竹帛功名四十秋
安得九重容借箸盡將軍國為前籌

九日言懷

淒淒大氣間炎涼破帽翻風客鬪狂酒味暗消黃蘗辣
雁聲喚得菊花香三京昔擬恢同軌九日今猶客異鄉
更仗阿誰上沙漠為予申意郭汾陽

呈鄱陽趙及甫

不學炎涼不自謀動和權勢作仇讐筆鋒帶怒搖山嶽

劍氣銜冤射斗牛
龍虎榜中當擢第
麒麟閣上合封侯
功名未入男兒手
誰肯甘為郡督郵

九日溪樓望遠

西風寥落做重陽
人在東南水一方
地僻阻他鴻雁信
天寒撩我菊萸觴
江澄素練魚翻赤
葉剪紅綃
蜨結黃不是倚闌迷望眼
欲憑歸雁問蘇郎

訴董寺丞

神首羅睺欲蝕天
彎弓直造玉皇前
九重不忍誅林甫

一札翻令囹圄馬遷投鼠固知當忌器得魚誰敢便忘筌
吾今一死初無憾願把孤忠託孟堅

寄小王徐子晉

十載長沙路二千歸心日夜在長安居家有譽眉空白
戀闕無謀心漫丹獲雁不聞蘇子信沐猴徒笑楚人冠
馬蹄恐有唐城便為把功名問二潘

獄中作

壯士剛腸不受冤髑髏可斷志難干乾仇未報薪當卧

欽定四庫全書

卷二百五十

漢賊猶存缺漫彈情款不從囚口責炙漿難塞吏腸寬
何當盡滲奸邪血染作衣裳看孟安

池亭即事

春風恰恰破桃李池館無人一徑深鷗刷斷翎翻水面
蝶拋殘粉出花心詩懷攪我丹心破節物催人白髮侵
流水伯牙今已矣世間那復有知音

南劍水閣

欲向津頭問鏤鉤一潭秋水漫烟霞畫屏對客景藏景

芳樹壓溪花，照花有策筵。
爭慚賈誼無功，廟食笑張華。
夜深霹靂轟雙劍，驚起延平十萬家。

丹青閣

閣上闌杆紫翠環，閣中身世異塵寰。
長虹吸月印秋水，孤鶩伴霞量晚山。
萬里風烟屏帳裏，一時人物畫圖間。
凌煙須是男兒事，却恐功名未放閒。

折桂園友人宴

牆頭羅綺碧雲濃，牆外鞦韆電掣空。
蝴蝶拍開花面粉，

鷓鴣吹落杏腮紅翠袖不卷珠簾月蠟燭還搖錦袖風
醉眼不知塵世有直疑身在廣寒宮

夜步水西

半鞞芒鞋過水西樓臺燈火未多時山羞見我頭頭轉
月怕拋人步步隨風月卷愁秋去早溪聲翻笑夜歸遲
柴門只解關烟雨不隔離愁此子兒

酒樓秋望

西風吹客上闌千萬里無雲宇宙寬秋水碧連天一色

暮霞紅映日三竿花搖舞帽枝猶軟酒入詩腸句不寒
古往今來恨多少一時收拾付盃盤

臨清閣

闌千古木瑣青蔥闌外簷花灼半空萬里好山春黛碧
一溪流水暮霞紅窗疎不礙東西月帆過始知南北風
試問支郎一樽酒好天良夜與誰同

思故人

十載無人問益乏誰於欬吐覓珠璣兩三千里家何在

三十六峯人未歸將謂抱薪能救燎果然畫餅不充饑
東川恐遇連榮祖一笑不須論是非

野菜吟

芙蓉峯下揚雄宅路入城闌里三百有山無粟養鷄豚
有水無人捕魚鼈山翁菜色流清涎齒頰連月無腥羶
客來問我何所有手指萬壑烟霞邊青芹不似蘆蒿美
石芥防風空剔齒酸腦纔抽稚子拳蘆芽已迸佳人指
兒童不待明朝陽花襟露濕爭慌忙攜籠拍塞貯不盡

歸來滿袖春風香攬衣踏破青銅鏡
按動碧雲流一徑
澆歸銀鼎作波濤無限春工上盤飣

寄許判院八首

閒亭無日不相隨
稍不相隨恨別離
況是一秋無信息
可無人寄問安詩

自慚兒女總江湖
鴻雁不來音信疎
且喜北堂珠玉眷
團圞環誦道家書

天音空洞豈虛傳
許我琅函誦半千
何事加持功已倍

日邊消息尚茫然

短棧封罷更重題生怕蒼頭去路迷說與不須多借問
葛廬只在白雲西

紅猊消盡水生花清夜迢迢玉漏賒環珮不知何處去
醉眠應是小卿家

毫端風雨走蛟螭人物風流冠一時要向行雲問蹤跡
青樓何處沒新詞

此去于門咫尺間樽壘無計得躋攀斷魂欲伴行雲去

猶恐歌喉誤小蠻

錦牋牙軸白雲詞君外知音更有誰一榻何時對風雨
與君聯臂話相思

漁父

江村水落富魚蝦半屬橋邊賣酒家莫訝鬢邊新有雪
夜來沉醉宿蘆花

寄趙德夫

男兒無路出邯鄲長鋏休從暗裏彈是處有魚堪下釣

扁舟何獨子陵灘

卷二百五十

兩宋名賢小集卷二百五十

欽定四庫全書

兩宋名賢小集卷二百五十一

宋 陳思 編

元 陳世隆 補

翠微南征錄 十

華岳

寄敬甫葉兄

歲次丁卯秋八月既生魄於時謫建安脫去未有策忽

觀星鳳光慨然陪履烏自謂入閩建閱人幾千百間有
知功名所建復邪僻否則苟利祿鄙猥何足責獨我子
敬甫挺挺出蠻貊舌端搖戈矛筆下羅疆場和以軍國
秘歷歷有奇畫以此方定交歸心已翰翮送君東郭門
握手不忍釋明年入中都首上平戎策甫結君相知便
念長沙謫細草天子書願置孤臣驛論薦方躊躇倚門
重垂白轍環溫清圍笑言方啞啞去我兩牛鳴恍若關
山隔去年槐花黃郡國書貢籍若以經濟材俯亦從此

役白屋寄簪纓青燈聯衽席談笑生風雷議論燦金碧
雪香飛梅花歸鞍整南陌別德殊未幾拳拳在朝夕君
腹坦東牀吾身繫西國從此嘆參商蓬瀛非咫尺紙
雖屢投奧援不我索星次幾一周幸我安且釋嘗觀義
與利更相為損益欲論古人交二者請君擇不惟眼獨
青且要心同赤此身可糞粉此道不可易自料吾與君
造物難棄擲胸次蓬萊山襟懷雲夢澤未說詩書帥休
論文章伯堂堂大丈夫豈可虛竹帛但恨不振蹤尚此

多扞格在君當先登挽回二千石饑溺切君身推解過
疇昔炎涼無異心始終無異迹庶幾吾二人交情可全
壁

記夢

夜漏徹三更夢牛入我屋有角斷而懸有足折而縮驚
覺細思量識有何禍福兆者事之先形者心之屬事既
兆於心夢乃形於腹入屋牛有盖為卒事刑獄吾今尚
縲囚其應已桎梏體具牢方具無足牢不足不足意無

他示予可脫輻去盖只論牛其義尤可錄牛足不下垂
得一生可續牛角不上橫得公去何速一旦忤君心吾
臯當何贖生去氣橫秋風馬不相逐下裂輿地圖上應
周天宿崢嶸挽萬鈞其始播百穀身雖在籠檻志不經
溝瀆甯戚不吾歌丙吉當吾哭安得如齊王過堂憐轂
轅

苦蚊

四壁人聲絕榻下蚊烟滅可憐翠微翁一夜敲打折

上運管張平國十首

妙年司釀水邊州浪迹曾陪汗漫遊紅粉夜嫌銀燭短
醉和明月下西樓

大江南畔五松西潘岳風流夢有詩歸路經從定留挽
莫教父老見旌旗

雨洗芙蓉沃眼青雪潭澄月照人明銅民指點向民說
未比當年令尹清

霜風十月客辭家廷老相期下九華檢早不逢陶靖節

喚船同過鯉魚沙

紫樞黃閣總青氈西掖東華墨尚鮮何事

闕

業

獨公蓮幕任淹延

閒將玉斧製羅紉醉引龍蛇競筆端流落

闕

軸

綠窗俱作畫圖看

武城三載促公歸自合班行列禁園計幕暫參知有在
野夫乘此便橫飛

朱顏綠鬢富春秋家世才華三總優不用鶴裘兼映雪

天然標格自風流

雲衢從此喜通亨
鳳閣鸞臺信脚行
願把恩風散寰宇

盛栽桃李作門生

英雄三載謫東南
二月東風始放還
馬瘦尚嫌歸路窄
願求屋上一青山

秋朝有感

十年版築歎勤劬
自笑青雲去路迂
昨夜高宗聞有夢
不知曾到傅岩無

聞有薦翠微者成二絕

二袁呂布漫豺狼孟德仲謀那易量顧我三逢三顧主
空教徐庶下南陽

韜鈴鼎鼐本同倫後世人才自淺深相國若能擒項籍
漢壇應不屬淮陰

有激呈江聖與判院

不郊不國不吾廬兀兀騰騰十載餘頸昔已逃三尺劍
腹今猶秘九疇書齊牛難熬吳元濟賈鵬何慙董仲舒

只合三緘且鉗口一蓑歸去伴樵漁

與楞伽老瑛上人

勿謂年來世道艱都緣彼此不相參一生知己有千萬
十事從人無二三紅杏無壇堪拱北白蓮有社結和南
扁舟若有東歸使斷竹枯松寄一簷

呈王子蒙隱者

國士還須為國憂肯同兒女作身謀存無補世亡無異
生不驚人死不休秦鹿還須屠狗逐楚猴猶為爛羊羞

如今若論西都事却與中唐風馬牛

夜讀離騷

楮衾封冷白凝霜
輾轉無眠夜未央
風欲送愁先卷帳
雨嫌多夢故敲窗
自慚鼓瑟投齊好
漫接歌興勸楚狂
起把離騷讀幽悶
楚詞還似楚江長

倪尚書生祠

聞說先生入建都
一年民樂吏清癯
四廂夜月封朱戶
兩院春風鎖翠廡
一旦有書追駟馬
萬冤無計徹羣烏

焚香再拜祝公壽問有清朝賞罰無

秋晚呈薛子長

一瓮香膠一曲琴得相尋處且相尋
覓覓却怪青山卜座久不知黃葉深
當路星軺已鉗口異鄉風物更關心
何時繫艇秋江上醉卧蘆花雪滿襟

雙桂堂

月姊親移入慶門廣寒今是並肩人
分他蟾窟雌雄種作我螢窗南北隣
傲竇雖慳三樹玉比詵翻剩一枝春

主人便好鞭黃鵠
研取魁梢謝紫宸

憶弟妹

別來三載客東南
始信人生聚首難
眼底不聞鴻雁信
鼻頭常為鵲鴿酸
問天不語語徒厲
薦地上心心類剗
安得春風吹馬首
卧聽行列報平安

責逋

索逋無術謁公門
豈謂公門反愴神
令尹辛酌三百索
痴兒猶戀一千緡
如今束手方知錯
自此甘心莫厭貧

不是恩波不旁治五窮無奈苦隨人

剗腸植粟餒官牛牛骨成塵粟未酎何事蓮參猶閣筆
反憐花縣若虛舟季公素重千金諾膠鬲當貽萬世羞
願效相如還趙璧莫教顏色歎牀頭

送趙右秋

梅花飛雪滿霜洲洲上行人去莫留蠟炬結花催管籥
雁聲喚客上蘭舟莫嫌冰炭情難入自是薰蕕味不侔
執節從教少知遇勿於世路學沉浮

閩藩齋指右參軍玉骨清無半點塵一味恤刑常召禍
十年遊宦只憂貧園扉月照金波夜寒谷花開玉樹春
客子與君雖素昧一詩聊記子張紳

牢城言懷

重城不隔世間塵箇裏無花別有春冤鬼夜隨風雨泣
病囚時作犬羊呻雷霆不霹欺君賊彗孛偏凌為國人
欲問老天天已老料應無說為敷陳

贈楞珈老瑛上人

無聊斲梗撥寒灰門掩桑風客自推急下火爐叉手接
便將布袋解頭開拂牀展卷呈詩藁炙盞分茶當酒杯
別後逢人須問訊楞伽曾倩寄書來

謝許判院惠米

溝壑膏粱總自招仲尼陳蔡亦囂囂不逢魯肅干困指
空折淵明五斗腰孤竹二饑知我意蒼梧一飽為君謠
從今隻手摩挲腹却向顏門問一瓢

除夜大雪

青帝明朝下玉京先教滕六掩車塵梅花笑我三年牖
椒葉爭他一夜春鳥角觸檐鞭墮玉馬蹄印路梳拋銀
何當夜縛吳元濟去作中興社稷臣

宿水陸寺

蕭寺廊廡濶無人獨自行吳儂非好僻楚客為誰清花
落憑風埽燈殘借月明江湖有烟浪且此寄餘生

呈魯伯瞻

信斷無青鳥盟來有白鷗悶和詩作首愁聽

缺

水

滴蓮花曉山空桂子秋功名有期會教缺

浦城買舟

微雨催行旆西風催客舟菊闕

浪

激花翻雪山涵影浸秋前灘闕

歸興呈吳夢祥

魚雁音書少關山夢寐遙對花思粉面遇闕

喜

意鵲應報歸心馬更驕西風綽鞭鉞飛闕

秋晚即事

秋宇清如洗，秋宵分外長。
寒鷄鳴午夜，征雁喚重陽。
楓葉已全赤，菊花纔半黃。
不知秋幾許，試與問蘇郎。

呈李景山

居靜心常樂，愁多鬢不禁。
買舟和月載，把酒對花斟。
白水有深淺，青山無古今。
從茲得真趣，消盡利名心。

小圃

舍北有餘隙，平褫作小園。
花存四五本，竹種兩三根。
風伯倩搖珮，月娥煩佐樽。
誰知方丈裏，別有一乾坤。

流螢

誰將殘草曳流螢月黑星昏分外明
老眼年來困躔度
恍疑流彗入王城

前年天狗落京西千里生靈血染衣
子夜不知螢電過
復憂天外一星飛

得金正將書

八行黥墨笑金暉今亦提兵上海涯
一介問安雖老畧
感恩猶勝李申之

莫出

無事何須出短籬
一闌風月足朱扉
幾回鞞起芒鞋去
帶得閒愁無限歸

自喻呈趙明甫


梁間燕子為喃喃
故下珠簾未欲還
料得無聲如反舌
不應留落在人間

惜秋

祝融噓火扇驕陽
北陸迎寒釀雪霜
安得金風專歲令

四時心地有清涼

詩到林頭落葉時眼前秋事已無幾何當領取秋容去
收拾詩囊帶得歸



兩宋名賢小集卷二百五十一

欽定四庫全書

集部

兩宋名賢小集卷二百五十二至四

詳校官中書_臣孫 溶

助教_臣常循覆勘

總校官編修_臣王燕緒

校對官助教_臣汪錫魁

謄錄監生_臣朱 恩

欽定四庫全書

兩宋名賢小集卷二百五十二

宋 陳思 編

元 陳世隆 補

竹齋詩集

裘萬頃字元量新建人淳熙十四年進士嘉定初除吏部架閣遷大理司直力丐外任添差江西撫幹卒有竹齋詩集

行役

宿霧鎖山椒落月桂林側崎嶇歷岡巒彷彿辨阡陌秋
高風露寒道遠時序迫安得歸故園篝燈理書冊

武陽渡

一舟小如葉橫在波濤中紛紛川上人欲渡愁北風有
帆天際來漸近葭葦叢寄聲與問訊恐是陶朱公

宿佛頭塔

孤村三四家籬下盡禾黍主人慣入市能作市井語聞

窻對竹山揖客延樽俎白雲忽在眼客淚墜如雨

羅溪橋

我來從西昌日日困塵土誰知羅溪橋淨若初過兩長
松列左右清風奏宮羽薄暮舍籃輿扁舟渡溪去

別友

清宵月滿梁相思幾搔首不圖塵土中共得一尊酒人
事好華甚隨後兩分手惟有管鮑心明明若箕斗

次許秀才韻二首

痴兒欲了事事竟莫之了崇朝弄朱墨校勘是與否徐
觀雁鷺行大半落渠手敗羣雖已去考牧未有道
拙工不量力自謂中了了高談蓋一座衆可已獨否斯
須臨斧斤便皆血兩手旁觀信善斲莫肯告以道

病中聞伯量相訪寄之二首

我屋修竹根身閒境逾靜維摩今無心誰令示人病夕
陽耿疎林影落莓苔徑佇立有所懷高人倘乘興

高人在城郭應酬頗紛如憶我烟霞栖遺我一紙書雨

餘憲戶涼蛩聲滿堦除相過有成言何時命巾車

次范光伯泛江韻

夫君陶阮徒俗子不能快屹然頽其中特立蓋甚介平生江湖樂欲去不得邁何當從君遊漁釣寄吾解

螳運

知戰不能損檀氏所以亡吾愧與敵槐將何固封疆及此閒暇時相與積乃倉不須更他驚富國兵自強

次伯仁善利閣小室韻

山林吾所廬夜月但對影焉知江上人一日了萬境寨
裳步崇臺有室妍且靜徘徊不能去坐見四山暝

見雪

兀冥當語誰餉我一簷雪吾廬本來靜得此更清絕遙
憐北海上往往已盈尺齧壇人在否毋凌漢臣節

出門

出門復入門吾行竟安之携書北窻下翻閱聊自怡有
懷千載人掩卷還歔歔采采首陽薇戀戀高山芝一裘

或終身欣然釣江湄斯人不可作斯道日湮微目前稻
梁謀鳬鴈方齊飛青田寂無音歲晚將疇依慎勿出門
去塵埃染人衣

菖蒲

康廬入吾懷十畝馳夢魂踵門者何人遺余以芳蓀歡
然得其趣如對五老言幽姿出巖谷常帶冰雪痕塵容
為一洗兩目不復昏忽思三峽流褰衣涉潺湲因仍一
寸石浸潤九節根人言可扶老歲月須其蕃茲理諒不

誣吾將從綺園

宿田家竹亭

我家西山嶺四壁皆此君
竭來事奔馳日與茅葦親
方思坡仙詩恐入俗士羣
邀我宿者誰此君滿其門
頌然千百夫一見若故人
夜深清風來好音夢中聞
呼童啟北窻為渠染爐芬

夜坐薦福寺次王成之韻

鞭驚未暇相追逐且向祇園止
君宿清談但得月華生

窻戶明明耿殘燭誰令泉石墮吾前洗盡人間絲與竹
風帆明發君不留此樂只因吾所獨

厭原山中曉行

碧鷄夜半聲啁晰喚起幽人步林樾秋高風露著羣木
無數寒花浥明月松篁一逕宛如畫石溜涓涓更清絕
山巔便好結茅廬莫待他年鬢成雪

秋試示諸兒

漠漠輕雲弄寒影霏霏不雨生秋興黃槐開盡舉子心

丹桂喜傳仙籍信竹籬雙手縮袖間坐看羣兒鏖一戰
春風躍馬不為難此去無言日邊遠

雨後

秋事雨已畢秋容晴為妍新香浮櫬桺餘潤溢潺湲機
杼蛩聲裏犁鋤鷺影邊吾生一何幸田里又豐年

涼風

涼風幾時動日暮已秋聲稍稍月華白紛紛林影清余
懷元不惡世事巧相撓所願西成後邊頭息戍兵

用鄭浮梁韻簡園師

杖履出蹊窄鐘魚佛界深
寒梅殘屋角春薺老墻陰
一水元無恙扁舟尚可尋
煩師掬清溜為我洗塵心

再用前韻

古寺規模壯空山歲月深
春隨千樹綠雲拂一溪陰
地僻人稀到官閒我得尋
歸來記清賞未覺負初心

次黃存之韻

客宦何時了官居又歲餘
歸心五湖夢病眼一牀書
近

作君能富新功我畧無不妨賦遊獵會有薦相如

賜谷偶成

愛日祛愁霧微知散積陰一窻塵外趣萬竹歲寒心士
要崇清節吾將老故林抱琴聊一醉何用覓知音

書率更西林碑

苒苒老將至區區心已疲文章非世用字畫漫兒嬉廬
阜多名刹隋人有斷碑驪黃雖易辨堂奧未容窺

歲晚送館人歸省

不厭冰霜路衝寒
辦一歸晨雞戒鞍馬
春酒壽庭闈燈火知辛苦
雲霄會奮飛
相期紆綠綬
非但戲斑衣

題洪內翰夾榭

霧閣雲窻天外安
懸知幽趣勝人間
簾櫳夜月浮銀海
桃李春風醉玉山
自笑紅塵無暇日
浪憑清夢覓商顏
如何飛佩隨君後
細看匡廬紫翠斑

次元德弟示從龍入學

生兒雖小莫憐渠
學問工夫在謹初
今日從師良不惡

他年閉戶反成疎雙親未老身無事諸父能文家有書
好與汝兄俱努力後生業裏試羣居

次洪內相菊亭

詩仙種菊未多時因菊名亭早有詩欲為寒花標晚節
故將新句寄東籬平生未省翻三峽高處那能贊一辭
便得從容侍公側回頭已是十年遲

次洪內相梅亭

人間多是梅開後旋踵東籬事故常那得紅簾捲朱戶

細看素質傲清霜
一生寄興雲山外
幾度搔頭江路旁
咫尺名園身未到
夜窻羞對返魂香

夜坐

爐火篝燈孰與同
此心吾欲付冥鴻
茅簷已作涉旬雨
蕙帳不禁連夜風
一段清愁詩句裏
十分寒事酒杯中
溪雲未用安緋雪
且聽梅花試小紅

雪

天花一夜洩春機
飛墜人間片片奇
有色有光欺柳絮

無聲無臭點梅枝縱橫萬舞風回處表裏雙清月霽時
此景惟詩可摹寫却憐老去不工詩

寄高菊礪謝忠詩集

高名如斗夜垂天無地追思每自憐正欲為君尋五老
乃蒙因我到雙泉新詩妙絕開方就稚子攜時喜欲顛
此去湖邊不多遠秋風當覓釣魚船

寄元齡弟

夜牀風雨夢到處東湖西山如接連安信喜隨烏雀後

雅懷知寄白雲邊
軒窓春動花夜滿
圖史香浮墨色鮮
箇裏詩書應未味
不妨兼讀養生篇

次元德弟

寧逐春風上下狂
懶從桃李借恩光
只因朝市風波惡
不似山林氣味長
莫惜舉杯邀太白
要看騎馬似知章
南征他日如相憶
詩句還須付革囊

玉山道中時赴掌故之命

麥田堆綠菜花黃
一簇人家古道旁
酒熟不妨邀里巷

年豐贏得事農桑世情只說宦遊好客裏那知歸興長
我有平生蓑笠在釣絲何日理斜陽

端午上饒道中

一春留滯在京華午日依前未到家細葛香羅素無望
黃塵烏帽亦堪嗟爭舟野渡人如簇立馬郵亭日欲斜
遙想頃篲獻親壽綵衣羅拜酌流霞

臨安別余求之

長安車蓋喜如雲邂逅惟君是故人風月滿懷情灑落

珠璣撒紙句清新携來客裏一尊酒洗盡湖邊十里塵
富貴功名大夫事別離無用淚沾巾

鄉人羅朝宗與兵部尚書京公有舊將往見之遇
余于樂平因餞別

四時成歲秋云暮九月肅霜天漸寒有客褰裳涉鄱水
逢人劇口話長安懸知欲聽星辰履厭見從來苜蓿盤
姑舉一觴餞行色無魚長缺切休彈

餞吳長文司理用修持賢業教無欠七字為韻

修

平生不量力妄意希前修
惜情雖無見拳拳未敢休

持

狂瀾湧如此砥柱真誰為
天意必有在吾身姑自持

賢

考亭無恙時從遊孰非賢
歲寒萬木凋松柏始傑然

業

聖賢去我遠何者名事業
我欲到彼岸須君借舟楫

教

過從資直諒夫豈勢利交謂朋黨者誰仁人姑聽教

無

人生天地間離別安能無莫作兒女態相期到丈夫

欠

君姿正而剛名節非所欠臨歧贈一言惟有學不厭

保福寺對橙菊有感

平生愛菊陶彭澤清夜移橙杜草堂千載詩魂招不得

獨留風味在僧房

有感

意行曾到夢江腰
占得雙泉第一寮
窗戶還深鐘磬遠
客塵都向靜中銷

癸亥夜夢

丙夜清眠正熟時
夢魂飛去拜丹墀
小臣乍得披肝膽
感慨分明涕淚垂

次洪內相十月桃韻三首

千紅萬紫凋零盡
安得枝頭數點紅
疑是神人寫春色
鎮長留影在屏風

舊日驪山宮殿中
玉妃無數舞衫紅
只應歸去蓬萊後
夢作寒花咲北風

不須羯鼓促春工
一樹霜邊取意紅
寄語元明為收拾
莫教人恨五更風

次洪內相雙竹韻三首

延平兩龍幾年卧
歛爾化作寒枝雙
春檜秋松皆敵國

會須因壘一時降

嬋娟兩枝翠可掬絕勝白壁南金雙留與先生作楊筆
詩壇八面受人降

管鮑交情真耐久夷齊意氣更無雙
虛花滿眼風號怒
一節青青終不降

薦福寺次許師咏竹

浮雲踪跡任西東翰墨場中且用工
時對此君哦七字
也勝痴坐辨幡風

次余仲庸松風閣韻十九首

飛花數點雨初歇
啼鳥一聲春正長
讀罷黃庭了無事
旋安銀葉試爐香

古木陰陰六月涼
幽花藉藉四時香
絲桐清夜作三弄
明月入簾風拂牀

爛漫花陰覆短牆
花開時候日偏長
道人不被春勾引
到處惟聞薝蔔香

不見詩仙何遜來
春風幾度早梅開
竹籬茅舍自清絕

未用移根東閣栽

怡則梅邊春意萌
困人天氣又清明
爐熏茗椀北窗下
卧聽絛蠻黃鳥聲

已著遺經洗此心
更尋流水濯吾襟
經旬不涉溪邊路
行帶苔錢如許深

霧閣雲窻先自幽
水聲那更繞源流
春深紅雨落桃徑
晝永清風生茗甌

揚柳陰中啼杜鵑
梧桐枝上噪玄蟬
篇章滿眼無人會

贏得詩翁取意編

紛紛眼底正爭馳我獨冥心絕五綦說與旁人俱不信
故山惟有白雲知

爭春桃李太怱怱隨手飄零逐曉風冰雪不侵塵不染
可人惟有歲寒松

顏楊翰墨今誰解陶謝篇章古所無安得金丹換凡骨
白頭深恐愧吾夫

平池春去水溶溶人在笙歌一部中柳葉翻風羅帶綠

荷花著雨錦衣紅

簷間新燕幾時來
簷外閒花往歲栽
紅杏碧桃渾落盡
綠陰低處結青梅

淡月籠花花映窻
好風吹竹竹浮香
夢回何處一聲笛
人靜山幽天正涼

無所用心魚在沼
居然生子燕成窠
誰言春去花事歇
萱草石榴情更多

為憐風雨趣春回
故著秋花到處栽
蘭菊從來盛風味

不妨環繞讀書齋

白雲殊不作世態流水更似知人心
溪邊濯足溪上坐
樵笛一聲秋滿林

坡谷遺書非復有向來一紙抵千金
誰知懸腕與卧筆
如用大都留此心

俗書本作于湖樣野鷺家雞強自分
王氏無人曾公死
只今何處覓雲仍

松齋秋吟

驕陽赫赫轉秋陰，便覺蕭然鬢影侵。
世事炎涼俄忽爾，閒來物理靜推尋。

宿翠巖寺呈李弘齋僉判

匡廬勝處君曾到，誰是淵明與遠公。
幸有和陶詩卷在，好依蓮社此山中。

同李僉判山行午飯野店簷外羣峰
盼盼因成絕句

脫略人間勢利場，來尋泉石共徜徉。
飯餘閒立茅簷外，

試問羣蜂有底忙

寄永居士修叔求菴記

翠琰新刊照眼明
流傳何日到柴荆
從今不恨論交晚
我亦碑中有姓名

脫山紙帳送宋居士

剪裁不惜送君先
要護高人雪屋眠
只恐鶴書催起去
長留空帳北山巔

題書院壁間碑

天上真龍去不回世間凡馬漫爭馳少年氣習今猶在
袖手時來省斷碑

日出

日出柴門尚懶開綠陰多處且徘徊槐花滿地無人掃
半在牆根覆紫苔

早作四首

雨過長江浪拍城迢迢義馭水中行旁人指點雲開處
喜見青山一抹橫

井梧飛葉送秋聲
籬菊絨香待晚晴
斗柄橫斜河欲沒
數山青處亂鴉鳴

北窻清冷不成眠
風遞蛩聲到枕邊
試喚兒童捲疎箔
一簷花影月娟娟

爐香清晚坐書帷
竹擁藤牀日到遲
自賦短章還自笑
不知顏閔有何詩

冬日早行

黃昏月妙剪雲開
夜半雷車載雨來
晨起鉤簾望霄漢

風花吹墮萬瑤瑰

午睡

午窻春日影悠悠一覺清眠萬事休堪笑邯鄲槐里夢
痴兒到老不回頭

入京道中曝背

露濕芳桃午未乾花時全似素秋寒征衫不敵東風力
試上郵亭曝背看

兩宋名賢小集卷二百五十二